

В СРЕДУ 3-Я СЕДМИЦЫ ВЕЧЕРА.

На Господи воззвах, поставим стихов 10. И поем самогласен дважды: и мученичен, и три подобны трипеснца.

Самогласен, глас 4:

Блудно расточих отеческое мое богатство, / пуст бых, во стране вселихся лукавых граждан, / и безсловесным уподобихся несмысленным скотом, / и всякия обнажихся Божественныя благодати. / Темже обращаю вопию Тебе благоутробному и щедрому Отцу: / согреших, приими мя кающаяся Боже, / и помилуй мя.

Мученичен: Жертвы одушевленные, / всесожжения словесная, мученицы Господни, / заколения совершенная Божия, / Бога знающая, и Богом знаемая овчата, / ихже ограда волком невходна, / молитесь и нам упасенным быти с вами на воде покоя.

Другия стихиры господина Иосифа. Глас 6.

Подобен: Всю отложивше:

Солнца мысленнаго зари явльшеся боговидцы апостоли, / просвещение испросите душам нашим, / и страстей избавитися мрачныя тьмы, / и день спасительный видети помолитесь, / постом и моленьми сердца очистившим, / яже лукавый уязви, / яко да вас верою спасаеми чтим присно, / всемудрым проповеданием / мир спасшия.

Подобен:

В страну блудный отшед злобы, / зле иждих еже ми Отче благоутробне, / богатство дал еси, / и гладом таю благих дел, / и студом преступления се одеяхся, / благодати Божия обнажаяся, и зову Ти: / согреших, вем бо Твою благость, / приими мя яко единого, Щедре, / от наемников Твоих Христе, / апостол моленьми возлюбльших Тя.

Ина стихира подобна господина Феодора. Глас тойже.

Подобен: Одесную Спаса:

Апостоли Спасовы, / светила вселенныя и благодетелие и спасителие, / Божия славы яко небеса поведателие, / и преукрашении звездами чудес, / и знаменьи исцелений, / прилежно о нас молитвы Господеви принесите, / в воню чистую, молитвы прияти наша, / и сподобитися всем живоноснаго Креста и целовати, / и видети страхом. / Того поклонением низпосли нам милости Твоя Спасе, / яко Человеколюбец.

И в Минеи 4. Слава, и ныне, Богородичен:

Прокимен, псалом 51, глас 4: Уповах на милость Божию во веки, и в век века.

Стих: Что хвалишися во злобе сильне?

Бытия чтение. [Глава 7, ст. 6 – 9.]

Ное же лет шести сот, и потоп водный бысть на земли. Вниде же Ное, и сынове его, и жена его, и жены сынов его с ним в ковчег, воды ради потопа. И от птиц чистых, и от птиц нечистых, и от скот чистых, и от скот нечистых, [и от зверей,] и от всех гадов пресмыкающихся по земли: Два два внидоша к Ною в ковчег, мужеский пол и женский, якоже заповеда [Господь] Бог Ною.

Прокимен, псалом 52, глас 4: Внегда возвратит Господь пленение людей Своих.

Стих: Рече безумный в сердце своем: несть Бог.

Притчей чтение. [Глава 9, ст. 12 – 18.]

Сыне, аще премудр будеши, себе премудр будеши, и искренним твоим: аще же зол будеши, един почерпнеши злая. сын наказан премудр будет, безумный же слугою употребится. иже утверждается на лжах, сей пасет ветры, той же поженет птицы парящая: остави бо пути своего винограда, в стезях же своего земледелания заблуди: проходит же сквозе пустыню безводную, и землю определенную в жаждех, собирает же рукама неплодие. Жена безумная и продерзая скудна хлебом бывает, яже не весть стыдения. Седе при дверех дому своего, на столце яве на стогнах, Призывающая мимоходящих, и исправляющих пути своя: Иже есть от вас безумнейший, да уклонится ко мне: и лишенным разума повелеваю, глаголющи: Хлебом сокровенным в сладость прикоснитесь, и воду татьбы сладкую пейте. Он же не весть, яко земнороднии у нея погибают, и во дне ада обретаются. но отскочи, не замедли на месте ея, ниже настави ока своего к ней: тако бо пройдеши воду чуждую, и преjdeши реку чуждую. от воды же чуждия ошайся, и от источника чуждаго не пей: да многое время поживеши, и приложатся тебе лета живота.

И абие Божественная служба Преподобных.

В ЧЕТВЕРТОК 3-я СЕДМИЦЫ, НА УТРЕНИ ТРОИЧНЫ.

По 1-м стихословии глаголем седальны апостольския Осмогласника.

По 2-м же стихословии глаголем настоящий седален,

господина Иосифа. Глас 6.

Подобен: Надежде мира:

Светила мира непрелестная, / ученицы Спасовы, / просветите мою душу грехом ослепшую, / и покажите Божественнаго дне общника, / храняща спасительныя заповеди, / и тьмы мя избавите оныя несветимыя, / яко да вас прославляю.

Слава, тойже.

И ныне, Богородичен:

Святая Владычице Богородице, / Христа Бога нашего Мати, / яко всех Творца неизреченно рождающая, / молися со апостолами священными / всегда благости Его, / страстей нас избавити, / и оставление нам дати грехов.

По 3-м же стихословии другой седален господина Феодора. Глас 6.

Подобен: Ангельския:

Мирозветлая светила божественнии апостоли, / просветите певцы ваша, / возмездие творяще времени поста, / достойно молящися, / всем видети древо живоноснаго Креста, / и лобызати нескверными устнами и очима, / вопиющим псаломски: / Господи слава Тебе.

Слава, тойже.

И ныне, Богородичен:

Надежде мира благая Богородице Дево, / Твое и едино страшное предстательство движем, / умилосердися на беспомощныя люди, / умоли милостивнаго Бога, / избавитися душам нашим от всякаго прещения, / едина Благословенная.

Канон Минеи, и настоящий трипеснец господина Иосифа.

И стихословится песнь. Глас 6.

Песнь 4.

Ирмос: Христос моя Сила, / Бог и Господь, / честная Церковь / боголепно поет взывающе, / от смысла чиста / о Господе празднующе.

Пост, слезы, молитвы, милостыню, благоумиленный нрав, мысль правую, жития чистоту, покажем вернии, яко да славы насладимся.

Светильницы светящи на тверди честныя Церкви, пресветло явистесь апостоли: темже просветите наша сердца Божественным Духом.

Яко Божественное углие вжегшися огнем невестественным, страстная вещества попалите сердца наших, мудрии Бога нашего апостоли.

Богородичен: Свещниче негасимый, чертоже всесветлый, серафим превышшая, херувимская колеснице Всенепорочная, грехов мя лютых и бед свободы.

Иный господина Феодора. Глас тойже.

Ирмос: Услыша пророк / пришествие Твое, Господи, / и убоися, / яко хочещи от Девы родитися / и человеком явитися, / и глаголаше: / услышах слух Твой / и убояхся: / слава силе Твоей Господи.

Светильницы богоявления, апостоли Спасовы явившеся, неведения ночь разрушите, и Церковь уяснивше, просвещаете вселенную огневещанными ученьми вашими.

Мир протекше, иный убо во иную страну, во едину веру вся собрасте апостоли, и улучивше небесная, ликуете, Христа непрестанно моляще, спастися всем нам.

Троицен: Сына от Отца, и Духа славлю, яко от солнца свет и лучу: оваго убо рождественне, зане и рождение: оваго же происходне, зане и происхождение, собезначальную Божественную Троицу, покланяемую от всякия твари.

Богородичен: Дева Младенца родившая, и чистоту соблюдшая Чистая, Ты явилася еси, Бога рождши и Человека, единого Того во обою зраку, чудо Твое Дево Мати, ужасает всякий слух и помысл.

Слава Тебе Боже наш, слава Тебе.

Молитвами вашими святыми, апостоли Господни, да сподобимся животворящий Крест облобызати чистыми устнами и очима, подлежащий сущим в мире, и покланяемый.

Ирмос: Услыша пророк / пришествие Твое, Господи, / и убоися, / яко хочещи от Девы родитися / и человеком явитися, / и глаголаше: / услышах слух Твой / и убояхся: / слава силе Твоей Господи.

Песнь 8.

Ирмос: Из пламене преподобным росу источил еси, / и праведнаго жертву водою попалил еси: / вся бо твориши, Христе, токмо еже хотети. / Тя превозносим во вся веки.

Моисеа пост Боговидца показа, и Илию огненною колесницею взят: потщися, помышлений вредных удержися, яко да долувлекущая, душе, избавишися прелести.

Поползнувся в горшая впадох, и язве струп прилагаю: исцели Христе, окамененное моего сердца ожесточение, апостольскими Щедре молитвами.

Мира светила богозарная, страстей наших облаки разорите, и поклонники светлаго Воскресения покажите, поюция Солнца славы.

Богородичен: Родове родов Тя Богоблаженная ублажают, якоже древле прорекла еси: едина бо человеком блаженное родила еси Слово несказанно, из Тебе воплощенное.

Иный.

Ирмос: Преподобнии Твои отроцы, / в печи херувимы подражаху, / трисвятую песнь воспевающе: / благословите, пойте / и превозносите во вся веки.

Во глубине прелести плавающая уловивше тростию веры апостоли, Господеви приведосте сия, благословящия, поющия и превозносящия Господа во веки.

Велия крепость Твоя во апостолах яко сени и судария их исцелевают болящия, благословящия, поющия и превозносящия Господа во веки.

Благословим Отца, и Сына, и Святаго Духа, Господа.

Троицен: Безначальным и рождеством же и происхождением Отцу поклоняюся рождшему, Сына прославляю рождшася, и воспеваю совозсиявша Отцу же и Сыну Духа Святаго.

Богородичен: Егоже родила еси Дево несказанно, всегда яко Человеколюбца не престай молящи, да бед спасет к Тебе прибегающия.

Слава Тебе Боже наш, слава Тебе.

Двоенадесятице святых апостол, честному Кресту сподоби неосужденно поклонитися мя, благословяща, поюща и превозносяща во вся веки.

Хвалим, благословим, поклоняемся Господеви:

Ирмос: Преподобнии Твои отроцы, / в печи херувимы подражаху, / трисвятую песнь воспевающе: / благословите, пойте / и превозносите во вся веки.

Песнь 9.

Ирмос: Бога человеком невозможно видети, / на Негоже не смеют чини ангельстии взирати: / Тобою же Всечистая, явися человеком / Слово воплощено, / Егоже величающе, / с небесными вои Тя ублажаем.

Боже и Господи Многомилостиве, моего сердца очисти язвы, покаяния мне прилагая лечбы: согреших, согреших Тебе, ущедри, спаси мя апостол Твоих молитвами, яко Многомилостив.

Стремлением безместным последовах умовредно, и вне себе весь бых, сластями жестокими питаемь, и спасительная лишаемь снеди блудный: Христе ущедри, и спаси мя.

Душе злобы не очистившаяся, и сластей тлетворных себе не удалившая, что безвременно радуешися постящися: сего бо поста не избра Господь, един нашего хотяй исправления.

Богородичен: Светом Божественным мене просвети, Дево Богородице, Света родительнице, и души моя мглу отжени, яко да блажу Тя, Юже блажат вси человечестии роди, якоже предрекла еси.

Иный.

Ирмос: Безсеменнаго зачатия / Рождество несказанное, / Матере безмужныя нетленен Плод, / Божие бо Рождение обновляет естества. / Темже Тя вси роди, / яко Богоневестную Матерь / православно величаем.

Словом невежи, премудри явистесь разумом, плетения словес мудрецов разрушивше, ветиям сугубствия, и число звездочетцов. Тем апостоли Христовы едина, всея вселенная показастесь учителяе.

Петр ветийствует, и Платон умолче: учит Павел, Пифагор постыдеса: прочий апостольский богословий собор, еллинское мертвое вещание погрешает, и мир совозоставляет к службе Христове.

Слава, Троицен: Единого единородителю, единороднаго Сына Отче: и едина единого, свете света сияние: и единый едина, единого Бога Святыи Душе, Господа, Господь воистинну сый. О Троице Единице Святая, спаси мя богословяща Тя.

Богородичен: Чудо Рождества Твоего удивляет мя Всенепорочная, како зачинаеши безсеменно необыменнаго? рцы, како девствуеши, рождши яко Мати? Еже паче естества верою прием, Рожденному поклонися: елика хочет бо, и может.

Слава Тебе Боже наш, слава Тебе.

Крест честный древо всесвятое, еже миру спасение процвете, видети и поклонитися вси да сподобимся, чистыми устнами и душею, молитвами всех вас святых апостол Христовых.

Ирмос: Безсеменнаго зачатия / Рождество несказанное, / Матере безмужныя нетленен Плод, / Божие бо Рождение обновляет естества. / Темже Тя вси роди, / яко Богоневестную Матерь / православно величаем.

Светилен гласа.

На стиховне, самогласен, дважды. Глас 6:

Сыноположения отпад блудный аз, / раболепно с свиниями питаюся, / и ниже тех пици насыщаяся, / прихожду к Тебе Отцу благоутробному, / отонудуже изыдох зле, / возвращаюся добре в покаянии зовый: / согреших на небо и пред Тобою, / Отче подаждь ми / во обращении великую милость.

Стих: Исполнимомся завтра милости Твоя Господи, и возрадовахомся, и возвеселихомся: во вся дни наша возвеселихомся, за дни в няже смирил ны еси, лета в няже видехом злая. И призри на рабы Твоя, и на дела Твоя, и настави сыны их.

Сыноположения отпад блудный аз, / раболепно с свиниями питаюся, / и ниже тех пищи насыщаяся, / прихожду к Тебе Отцу благоутробному, / отонудуже изыдох зле, / возвращаюся добре в покаянии зовый: / согреших на небо и пред Тобою, / Отче подаждь ми / во обращении великую милость.

Таже стих: И буди светлость Господа Бога нашего на нас, и дела рук наших исправи на нас, и дело рук наших исправи.:

Мученичен: Избранныя удиви и святыя Бог наш, / радуйтесь и веселитесь вси раби Его, / вам бо уготова венцы, / и Царствие Свое: / но молим, / и нас не забудьте.

Слава, и ныне, Богородичен:

Богородице, Ты еси лоза истинная, / возрастившая нам Плод живота: / Тебе молимся, молися Владычице, / со святыми апостолы / помиловати души наша.

НА 6-М ЧАСЕ ТРОПАРЬ ПРОРОЧЕСТВА. ГЛАС 3:

Аще беззакония назриши Человеколюбче, / кая спасения надежда нам? / Но Твою свыше помощь, / яко Щедр, людем Твоим низпосли Господи.

Прокимен, псалом 53, глас 4: Боже, во имя Твое спаси мя, и в силе Твоей суди ми.

Стих: Боже, услыши молитву мою, внуши глаголы уст моих.

Пророчества Исаиина чтение. [Глава 11 ст. 10 – 16. Глава 12 ст. 1 – 2.]

Также глаголет Господь: будет в день оный корень Иессеов, и востаяй владети языки, на того языцы уповати будут: и будет покой его, честь. И будет в день оный, приложит Господь показати руку Свою, еже возревновати по останку прочему людей, иже аще останет от Ассириов, и от Египта, и Вавилона, и от Ефиопии, и от Еламитов, и от востоков солнца, и от Аравии, и от островов морских. И воздвигнет знамение в языки, и соберет погибшия Израилевы, и расточенныя Иудины соберет от четырех крил земли. И отыметсся ревность Ефремова, и врази Иудины погибнут: Ефрем не возревнует Иуде, и Иуда не оскорбит Ефрема. И полетят в кораблях иноплеменничих, море купно пленят, и сущих от восток солнца, и Идумею: и на Моава первее руки возложат, сынове же Аммони первии покорятся. И опустошит Господь море Египетское, и возложит руку Свою на реку духом пресильным: и поразит на семь дебрый, якоже преходити ю во обувении: И будет прошествие людем Моим оставльшим во Египте, и будет Израилю, якоже в день, егда изыде от земли Египетския. И речеши в день оный: благословлю Тя, Господи, яко разгневался еси на мя, и отвратил еси ярость Твою [от мене,] и помиловал мя еси. Се Бог мой, Спас мой, уповая буду на Него, и не убоюся: зане слава моя и похвала моя Господь, и бысть ми во спасение.

Прокимен, псалом 54. Глас 7: Внуши Боже, молитву мою, и не презри моления моего.

Стих: Вонми ми, и услыши мя.